

Kisah dari Solaris: Anorthite

Anorthite sedang terbang mengelilingi Wastelands pada suatu petang, apabila dia tiba-tiba terlihat sebuah asteroid yang tidak ditanda pada petanya. Kerana dia ingin tahu, Anorthite mendarat di permukaan berbatu asteroid itu untuk meneroka. Selepas berjalan beberapa kilometer, dia akhirnya ternampak dari jauh sebuah bangunan kecil yang aneh.

Sedang Anorthite menghampiri bangunan itu, pintu-pintunya yang licin terbuka sejurus selepas mengesan ketibaannya. Huru-hara tercetus dengan serta-merta! Sebuah dron muncul, melontarkan kerikil angkasa lepas yang tajam dan kepingan logam berkarat yang pecah ke arah Anorthite. Penjelajah itu dengan cepat melompat ke belakang sebuah batu besar dan mengeluarkan laso kesayangannya. Dengan menyentak sesungutnya, Anorthite menangkap dron itu dengan lasonya dengan rapi, menghalang dron itu daripada mencapai peluru-peluru kerikilnya.

Sedang Anorthite mendekati dron itu dengan berhati-hati, dia dapat mendengar dron itu memberitahu dirinya sendiri secara berulang kali: "Lindungi. Lindungi. Lindungi."

Ada sesuatu yang tidak betul!

"Saya di sini bukan untuk menyakiti anda," kata Anorthite, berdiri di hadapan dron itu. "Apa atau siapakah yang anda cuba lindungi?"



Kisah dari Solaris: Anorthite

Pandangan dron itu melewati Anorthite, ke arah kabin logam kecil. Anorthite tidak lagi bersembunyi daripada serpihan yang berjatuhan, jadi dia dapat melihat dron-dron lain yang sudah berkarat dan pecah di dalamnya – kesemuanya diperbuat dengan reka bentuk dan model yang sama dengan dron yang menyeranginya.

“Adakah ini... keluarga anda?”

Dron itu mengeluarkan bunyi bip yang bernada sedih sebagai pengesahan. Sedang Anorthite memerhatikan dron-dron yang telah dinyahaktifkan itu, dia menyedari bahawa dron-dron itu adalah robot peneroka, ditugaskan untuk memahami lebih lanjut tentang Wastelands. Walau bagaimanapun, dron-dron itu telah menjelajah terlalu jauh ke dalam Wastelands sehingga terputus hubungan dengan stesen angkasa lepas Solaris, dan terpaksa membela diri sendiri. Melihatkan robot yang ditangkap dengan laso dan dron-dron yang lain yang serba senyap, Anorthite berkata, “Baiklah, saya ada idea! Tetapi pertama-tama, anda perlu berjanji — JANGAN LONTARKAN KERIKIL LAGI.”

Anorthite memuatkan kesemua robot itu ke dalam kapal angkasa lepasnya dan terbang pulang ke Solaris. Di sana, dia memastikan bahawa kesemua robot itu diperbaiki, dicas semula, dan dikemaskinikan kepada sofwe terkini. Dengan pasukan penerokaan robotnya yang baru, Anorthite menemui satu khazanah yang paling hebat: menemui kawan baru untuk berkongsi pengembaraannya.

